

ces bonnes gens ne decouurent les mouuements de leur cœur, que dans les occasions qui se presentent, & que nous n'auons pour lors, ny plume, ny encre, pour les remarquer, nous laissons écouler quantité de faintes affections de ces bons Neophytes, sans les remarquer; Adioustés que la ressemblance de ses actions, me fait craindre le dégoust, pour ce que cela femble des redites.

L'un de ces trois chefs de famille fut nommé Achilles par Monsieur le Cheualier de l'Isle, lequel prend grand plaisir de voir ces bonnes gens se ranger au bercail de l'Eglise: Tant que des hommes de vertu & de merite tiendront icy le timon, la foy y florira: Si ceux qui doiuent estre [65] comme les yeux, s'aueuglent iamais dans les vices, le beau iour dont maintenant nous iouïssons, fera bien-tost changé en des tenebres. Mais pour parler de nostre Neophyte, ie ne fais pas moins de cas de celui-cy que de Charles; il est vray qu'il n'a pas si grande autorité, qu'il a moins de parole, mais ie croy que son cœur n'est pas moins touché; il estoit fort orgueilleux deuant son baptesme, nous en esperions peu de chose, Dieu l'a conuertie en un petit agneau; son pere estoit Capitaine, plus aimé des François qu'il ne les aimoit, il a esté miserablement massacré par les Hiroquois; son fils a maintenant autant de bonnes qualités que son pere en auoit de mauuaises: Il fut baptisé en Nouembre, & tomba malade au mois de Decembre; on le tenoit pour mort: La crainte que nous auions qu'il n'attribuast sa maladie à son baptesme cōme font les infideles, nous portoit à le visiter souuent, nous en retournions tousiours tres-consolés: Ie ne m'attriste point de ma maladie, ie ne crains point la mort; ie